



Pravilnik
o prijavljivanju korupcije i zaštiti lica koje prijavi korupciju u
Centralnoj izbornoj komisiji Bosne i Hercegovine

Sarajevo, april 2014. godine

Na osnovu člana 5. stav (2) Zakona o zaštiti lica koja prijavljuju korupciju u institucijama Bosne i Hercegovine („Službeni glasnik BiH“, broj 100/13) i člana 61. stav (2) Zakona o upravi („Službeni glasnik BiH“, broj 32/02 i 102/09), Centralna izborna komisija Bosne i Hercegovine je, na 15. sjednici održanoj 09.04.2014. godine, d o n i j e l a

P r a v i l n i k
o prijavljivanju korupcije i zaštiti lica koje prijavi korupciju u
Centralnoj izbornoj komisiji Bosne i Hercegovine

POGLAVLJE I. Opće odredbe

Član 1.
(Predmet)

Ovim pravilnikom uređuje se način prijavljivanja korupcije i drugih nepravilnosti u Centralnoj izbornoj komisiji Bosne i Hercegovine (u daljnjem tekstu: Centralna izborna komisija BiH), postupanje po zaprimljenim prijavama korupcije i drugih nepravilnosti, razmatranje zaprimljenih prijava korupcije i drugih nepravilnosti, obaveza obavještanja lica koje je prijavilo korupciju i druge nepravilnosti o poduzetim radnjama, zaštita lica koje prijavi korupciju i druge nepravilnosti i druga pitanja koja su u vezi s prijavljivanjem korupcije i drugim nepravilnostima u Centralnoj izbornoj komisiji BiH.

Član 2.
(Primjena)

U slučaju prijavljivanja korupcije ili drugih nepravilnosti od strane lica koja nisu zaposlena u Centralnoj izbornoj komisiji BiH shodno će se primjenjivati odredbe ovog pravilnika.

POGLAVLJE II. Prijavljivanje korupcije i drugih nepravilnosti

Član 3.
(Pravo na prijavljivanje korupcije i drugih nepravilnosti)

(1) Svaki državni službenik, zaposlenik ili drugo lice zaposleno u Centralnoj izbornoj komisiji BiH, koje ima saznanja ili materijalne dokaze o postojanju korupcije ili drugih nepravilnosti u Centralnoj izbornoj komisiji BiH, može podnijeti prijavu zbog postojanja korupcije ili drugih nepravilnosti ili okolnosti koje ukazuju na postojanje korupcije ili drugih nepravilnosti.

(2) U smislu ovog pravilnika:

- a) pod korupcijom se smatraju radnje koje imaju obilježja krivičnog djela i
- b) pod drugim nepravilnostima se smatraju radnje koje predstavljaju kršenje etičkog kodeksa ili disciplinske povrede, odnosno radnje koje imaju obilježje prekršaja.

(3) Zloupotreba prava prijavljivanja iz stava (1) ovog člana predstavlja povredu radne dužnosti.

(4) Pravo na prijavljivanje nepravilnosti iz stava (1) ovog člana ne utiče na pravo zaposlenog da podnese zahtjev za pokretanje disciplinskog postupka u skladu s odredbama Zakona o državnoj službi u institucijama Bosne i Hercegovine, Zakona o radu u institucijama Bosne i Hercegovine, Pravilnika o disciplinskoj odgovornosti državnih službenika u institucijama Bosne i Hercegovine, Pravilnika o disciplinskoj i materijalnoj odgovornosti zaposlenika u institucijama Bosne i Hercegovine i drugih podzakonskih akata kojima je ovo pravo regulisano.

Član 4.

(Nadležno tijelo za prijem i razmatranje prijava)

(1) Centralna izborna komisija BiH će svojom odlukom imenovati komisiju za prijem, evidenciju i postupanje s prijavama korupcije i nepravilnosti (u daljnjem tekstu: Komisija), a odluka o imenovanju komisije, sa imenima članova komisije, objavljuje se na oglasnoj ploči Centralne izborne komisije BiH.

(2) Prijavljivanje korupcije i drugih nepravilnosti vrši se tako da se prijava podnosi Komisiji.

(3) Izuzetno od stava (2) ovog člana, prijavu korupcije i drugih nepravilnosti, podnesenu nadređenom licu, nadređeno lice će, u vidu službene zabilješke, hitno dostaviti Komisiji.

Član 5.

(Obaveze Komisije)

Obaveze Komisije su:

- a) prijem prijava o korupciji i nepravilnostima;
- b) provođenje prethodnih radnji utvrđivanja osnovanosti prijave korupcije, odnosno druge nepravilnosti;
- c) uz odobrenje Centralne izborne komisije BiH provođenje finalnih radnji utvrđivanja osnovanosti prijave korupcije, odnosno druge nepravilnosti;

- d) obavještanje podnosioca prijave, najkasnije u roku od 15 dana od dana prijema prijave, o odbacivanju, rješavanju ili o finalnom roku potrebnom za zaključenje slučaja;
- e) pripremanje izvještaja o nepravilnostima i izvještanje Centralne izborne komisije BiH;
- f) svaku zaprimljenu prijavu, odnosno službenu zabilješku o prijavi, odmah evidentirati u centralnu evidenciju svih prijava korupcije i drugih nepravilnosti;
- g) svaku zaprimljenu prijavu, podatke navedene u prijavi, kao i identitet lica koje je podnijelo prijavu dužni su tretirati kao službenu tajnu;
- h) neće provoditi aktivnosti usmjerene na otkrivanje identiteta anonimnog prijavitelja;
- i) Komisija će o pravima i obavezama iz ovog pravilnika upoznati sve zaposlene u Centralnoj izbornoj komisiji BiH i
- j) promovisati etiku i kulturu otkrivanja i rješavanja nepravilnosti u radu.

Član 6.

(Načini prijavljivanja)

(1) Prijavljivanje može biti povjerljivo ili anonimno.

(2) Prijavljivanje sadrži:

- a) informaciju o djelu korupcije ili druge nepravilnosti koja se prijavljuje sa činjeničnim opisom (mjesto i datum dešavanja, opis nepravilnosti...),
- b) ime, prezime i naziv radnog mjesta zaposlenog na kojeg se prijava odnosi i svjedoka i/ili drugo uključeno lice,
- c) informacija da li su nadređeno ili odgovorno lice već upoznati s postojanjem nepravilnosti,
- d) da li su već poduzete određene radnje na otklanjanju nepravilnosti i
- e) prijedlog o dokazima, odnosno predmetima koji služe kao dokaz, materijale koji potvrđuju navode zahtjeva (u smislu pismenih dokaza u prilogu, ukoliko ih podnosilac prijave posjeduje).

Član 7.

(Povjerljivo i anonimno prijavljivanje)

(1) Povjerljivo prijavljivanje jeste prijavljivanje kod kojeg je Komisiji poznat identitet lica koje je podnijelo prijavu.

(2) Anonimno prijavljivanje može se vršiti putem pošte na adresu Centralne izborne komisije BiH i na web stranici Centralne izborne komisije BiH, bez navođenja identiteta podnosioca prijave.

(3) Komisija, kao i sva lica koja budu postupala po navedenoj prijavi dužna su da samu prijavu, podatke navedene u prijavi, kao i identitet lica koje je podnijelo prijavu tretiraju kao službenu tajnu.

(4) Zabranjuju se sve aktivnosti usmjerene na otkrivanje identiteta anonimnog podnosioca prijave.

(5) Ukoliko se prijava odnosi ili je u vezi s članovima Komisije, prijava se podnosi Centralnoj izbornoj komisiji BiH.

(6) Ukoliko se prijava odnosi na korupciju, pod prijavljivanjem podrazumijeva se i prijava licu ili organu koji obavlja poslove finansijske revizije u Centralnoj izbornoj komisiji BiH.

Član 8.

(Obaveze, nadležnosti, rokovi postupanja i izvještavanja)

(1) Po prijemu prijave Komisija samostalno provodi prethodne radnje utvrđivanja osnovanosti prijave korupcije, odnosno druge nepravilnosti u konkretnom slučaju, a uz odobrenje Centralne izborne komisije BiH provodi finalne radnje.

(2) S ciljem provođenja prethodne radnje utvrđivanja osnovanosti prijave Komisija ima, kada je to neophodno radi utvrđivanja osnovanosti prijave, pravo neposrednog uvida u predmete, akte i službene prostorije Centralne izborne komisije BiH.

(3) Komisija je dužna izvršiti prethodne radnje utvrđivanja osnovanosti navoda iz prijave i utvrđivanje pravne kvalifikacije prijavljenog djela, u roku od 10 dana od dana dobijanja prijave, te o tome informisati Centralnu izbornu komisiju BiH koja donosi odluku o zaključenju slučaja ili o poduzimanju finalnih radnji utvrđivanja osnovanosti prijave korupcije i drugih nepravilnosti.

(4) Centralna izborna komisija BiH, odnosno po njenom ovlaštenju Komisija, obavijestit će podnosioca prijave, najkasnije u roku od 15 dana od dana prijema prijave, o odbacivanju, rješavanju ili o krajnjem roku potrebnom za finalne radnje utvrđivanja osnovanosti prijave korupcije i drugih nepravilnosti.

(5) Izuzetno od stava (4) ovog člana, anonimni podnosilac prijave neće biti obaviješten o poduzetim prethodnim i finalnim radnjama, osim ako postoji odgovarajuća tehnička mogućnost dvosmjerne komunikacije s anonimnim podnosiocem prijave.

(6) Nakon završetka prethodnih radnji utvrđivanja osnovanosti prijave i odluke Centralne izborne komisije BiH o provođenju finalnih radnji utvrđivanja osnovanosti prijave, u smislu stava (3) ovog člana, Komisija ima ovlaštenje da uzima izjave od državnih službenika, zaposlenika i drugih zaposlenih u Centralnoj izbornoj komisiji BiH, u vezi s predmetom prijave i ostale neophodne radnje za finalno utvrđivanje osnovanosti prijave.

(7) O radnjama iz stava (3) i (6) ovog člana sačinjava se službena zabilješka.

Član 9. **(Registar prijava)**

(1) Komisija je dužna svaku zaprimljenu prijavu, odnosno službenu zabilješku o prijavi, odmah evidentirati u centralnu evidenciju svih prijava korupcije i drugih nepravilnosti.

(2) Pristup centralnoj evidenciji imaju Centralna izborna komisija BiH, Komisija i ovlaštena službena lica kada je pristup centralnoj evidenciji potreban radi utvrđivanja osnovanosti prijava korupcije i drugih nepravilnosti, odnosno radi utvrđivanja da li je došlo do zloupotrebe prava na prijavljivanje iz člana 3. stav (3) ovog pravilnika.

Član 10. **(Postupanje s prijavama koje se odnose na krivična djela)**

U slučaju kada je Komisija utvrdila da prijava ima osnova te da se na osnovu prijave ili radnji provedenih na utvrđivanju njene osnovanosti može zaključiti da navedeno djelo ima obilježja krivičnog djela, Centralna izborna komisija BiH će o istom informisati nadležno tužilaštvo.

Član 11. **(Postupanje s prijavama koje se odnose na disciplinsku odgovornost)**

U slučaju kada je Komisija utvrdila da prijava ima osnova te da se na osnovu prijave ili radnji provedenih na utvrđivanju njene osnovanosti može zaključiti da navedeno djelo ima obilježja disciplinske odgovornosti, Centralna izborna komisija BiH, u skladu s odgovarajućim propisima koji regulišu pitanje disciplinske odgovornosti, pokreće disciplinski postupak protiv zaposlenog.

Član 12. **(Poduzimanje radnji s ciljem otklanjanja štetnih posljedica počinjenog djela)**

(1) U slučaju da je prilikom provođenja radnji na utvrđivanju osnovanosti prijave utvrđeno da ista ima osnova, Centralna izborna komisija BiH će poduzeti potrebne radnje radi

sprječavanja daljnjeg nepravilnog postupanja i otklanjanja štetnih posljedica počinjenog djela.

(2) Svi državni službenici, zaposlenici i drugi zaposleni u Centralnoj izbornoj komisiji BiH dužni su, u okviru svojih nadležnosti i ovlaštenja, poduzeti potrebne radnje radi sprječavanja daljnjeg nepravilnog postupanja i otklanjanja štetnih posljedica počinjenog djela.

POGLAVLJE III. Zaštita podnosioca prijave i lica koje ima status zviždača

Član 13.

(Zaštita prava podnosioca prijave)

(1) Prema zaposlenom koji ima saznanja o postojanju korupcije, odnosno druge nepravilnosti, ili koji prijavi korupciju, odnosno drugu nepravilnost u Centralnoj izbornoj komisiji BiH ne smiju se poduzimati bilo kakve štetne radnje koje imaju za cilj odvracanje od prijavljivanja korupcije ili druge nepravilnosti, odnosno kažnjavanje zbog izvršenog prijavljivanja korupcije ili druge nepravilnosti.

(2) Centralna izborna komisija BiH, kao i drugi neposredno i posredno nadređeni licu koje je prijavilo korupciju, odnosno drugu nepravilnost, dužni su osigurati zaštitu ličnog i profesionalnog integriteta lica koje je prijavilo korupciju ili drugu nepravilnost u Centralnoj izbornoj komisiji BiH.

Član 14.

(Odgovornost podnosioca prijave zbog zloupotrebe prava)

(1) Zloupotreba prava prijavljivanja predstavlja povredu službene dužnosti.

(2) U slučaju kada se prilikom provođenja radnji na utvrđivanju osnovanosti prijave ili kasnijih radnji utvrđivanja odgovornosti za prijavljena djela utvrdi da je podnosilac prijave, suprotno odredbama Zakona o zaštiti lica koja prijavljuju korupciju u institucijama Bosne i Hercegovine i ovog pravilnika, zloupotrijebio pravo prijavljivanja, o tome će biti obaviještena Agencija za prevenciju korupcije i koordinaciju borbe protiv korupcije i Upravna inspekcija Ministarstva pravde Bosne i Hercegovine, radi pokretanja prekršajnog postupka u skladu s odredbama člana 12. stav (3) Zakona o zaštiti lica koja prijavljuju korupciju u institucijama Bosne i Hercegovine.

(3) Ukoliko se utvrdi da zloupotreba prava prijavljivanja sadrži elemente krivičnog djela lažnog prijavljivanja, Centralna izborna komisija BiH će o počinjenom krivičnom djelu obavijestiti nadležno tužilaštvo.

Član 15.

(Pravo na dobijanje statusa zviždača)

- (1) Lice koje prijavi korupciju ima pravo obratiti se Agenciji za prevenciju korupcije i koordinaciju borbe protiv korupcije za dodjelu statusa zviždača, ukoliko smatra da bi zbog navedenog prijavljivanja prema njemu mogle biti poduzete štetne mjere ili su već poduzete.
- (2) U skladu s odredbama Zakona o zaštiti lica koja prijavljuju korupciju u institucijama Bosne i Hercegovine, lice koje dobije status zviždača neće se smatrati materijalno, krivično ili disciplinski odgovornim za otkrivanje poslovne tajne u slučaju prijavljivanja korupcije nadležnom autoritetu.

Član 16.

(Postupanje po instrukciji Agencije)

- (1) U slučaju kada je Agencija za prevenciju korupcije i koordinaciju borbe protiv korupcije, u skladu s odredbom člana 8. stav (2) Zakona o zaštiti lica koja prijavljuju korupciju u institucijama Bosne i Hercegovine, donijela instrukciju, Centralna izborna komisija BiH će izvršiti korektivnu mjeru s ciljem otklanjanja učinjene štetne radnje u roku od tri dana od dana zaprimanja instrukcije.
- (2) Korektivna mjera će biti ukidanje štetne mjere i vraćanje u prethodno stanje.

POGLAVLJE IV. Prelazne i završne odredbe

Član 17.

(Obaveza upoznavanja sa odredbama pravilnika)

- (1) Zadužuje se Sektor za finansijske i opće poslove Centralne izborne komisije BiH da o pravima i obavezama iz ovog pravilnika upozna sve zaposlene u Centralnoj izbornoj komisiji BiH te ga objavi na oglasnoj ploči i web stranici Centralne izborne komisije BiH.
- (2) Svi zaposleni u Centralnoj izbornoj komisiji BiH dužni su potpisati izjavu o tome da su upoznati s pravima i obavezama iz ovog pravilnika i Zakona o zaštiti lica koja prijavljuju korupciju u institucijama Bosne i Hercegovine, a ona će se uložiti i čuvati u njihovom personalnom dosjeu.


Član 18.

(Stupanje na snagu)

Ovaj pravilnik stupa na snagu danom donošenja.

Broj: 05-1-02-2-334-2/14

Sarajevo, 09.04.2014. godine



Stjepan Mikić

Stjepan Mikić